

1551 perio exierat; qui secum Dragutem ducens nonis julii Corcyrae euripum praevertectus, cum ad Siciliam appulisset, an de Aphrodisio, ac Canestrio sibi restituendis Caesaris mandata accepisset, a Prorege peti iussit; ea si haberet, nullius damno, aut injuria cursum in orientem flexurum. Insueta certe res, quæque cunctos in admirationem raperet, præpotentem navigiorum numero, ac viribus classem Byzantio usque in Siciliam provectam, pacifico cursu intra Hellespontum se subducere. Sed cum ejusmodi a Prorege responsum tulisset, ob ea oppida ex archipiratae humani generis hoste manibus erepta adversus inducias, quæ Caesari cum Suleimano essent, nil actum existimare, neque ad ea restituenda obstringi; commotus ira Sinanes, Augustam urbem incendit, arcem tormentis disiectam nullo obsistente, capit, ac diripit. Nam Andreas Auria cum quadraginta triremibus adhuc in Hispania, quo, ut diximus, Philippum, & Maximilianum devexerat, detinebatur. Antonius illius nepos, qui circa Neapolim, ac Siciliam cum quindecim triremibus substiterat, & ad comneatus, tormenta, aliaque belli usui necessaria in Aphrodisium importanda proficiscebatur, ad Lampedusam insulam tempestate correptus, octo triremes amiserat, cum reliquis in Africam trajiciens, præsidio, quod supererat in urbem immisso, reversus est.

*Sinanii  
Basse, clas-  
sis Turcarum  
imp. a Sici-  
lia prorege  
postulata.  
Sicilia pro-  
regis respon-  
sum.*

*Augusta a  
Sinane ca-  
pta.*

*Antonius  
Auria tem-  
pestatis vi  
octo trire-  
mes amir-  
it.*

*Gaulum a  
Sinane ca-  
ptum.*

Turcae e Sicilia ad Melitam profecti, insulam, barbaræ crudelitatis vestigiis relictis, vastarunt; ac novem eductis muralibus tormentis, cum urbem, atque arcem aggredi Sinanes vellet, rei difficultate deterritus, milites, ac machinas recipi intra triremes iussit. Inde ad Gaulum, octo a Melita passuum millibus profectus, exscensione militum facta, tormentisque eductis, oppidum adoritur; in quo primo machinae ictu præfecto, summa opinione virtutis inter Hierosolymitanos milites, discerpto, ac cæso, triduo assiduus verberationibus oppido eo simul cum arce concusso potitur. Eo everso, tribusque hominum millibus in servitutem abductis, recta Leptim, *Tripolis* hodie dicitur, Africæ urbem, contendit. Leptitani, quo expeditius oppidum tuerentur, in duas naves mulierum, senum, ac puerorum turbam inutilem, atque imbellem conjectam, asportari in Siciliam iussere; quæ cum forte in Turcicam classem incidissent, capta, miserandæ servitutis jugum subi-